


# KELEKE YE PUMILWE, KA LIFASI

 Jesu Kreste, Mwana Hae, mi ulufile lika kaufela kusina tifo ku Kreste. Lu itumezi ku Wena, Mulena, ka matohonolo elufilwe ki sitabelo Sesituna sani Jesu na lufile fa Kalvari, kuli si lu kutiseze mwa kopano ni sishemo ku Wena, kuli lube ni ciseho ya kuziba kuli ku ñozwi, “Ha muina ku Na, ni Manzwi Aka ku mina, mu kupe semu lakaza, mi muka si eze zwa.” Cwale, lu itumezi ka se, mi lu lapela kuli Uka lufa tumelo ya ku silumela ka seo kaufela sili ku luna.

<sup>2</sup> Cwale lu beye kwa tuko, Mulena, masulungundu kaufela a lizazi, kaufela ze bilaeza za bupilo bo, mane cwalo ku kalela kuwa fa munyako kuisa ku mulisana, kuli kutokwe sika mwa minahano ya luna cwale, kono ibe ku libelela, ku teezeza ka likute kuli Moya o Kenile uambole ku luna, kuli lupete taba yeñwi yende, ya ku ziba buñata bwa Hao, ka kukopana kwa luna hamoho. Kakuli, Mulena, kaniti kona ha lutile ka lizazi leli cisa le. Ambola ku luna ka Linzwi la Hao leli pila, mi tuhela Linzwi leli pila kuli liyahe ku luna ni kuina ku luna, kuli lu tomahanyiwe ni ku bupywa, isi kaza lifasi, kono lu cincwe ka ku shemunwa kwa mioya ya luna, kuisiwa mwa sibupeho sa Mwana Mulimu. Oh, lipilu za luna za ngangama ha lu nahana, mi ni tabo itala mwa mioyo ya luna, ka kuziba kuli lukona ku bizwa bana ba bashimani ni ba basizana ba Mulimu. Lu yemi fa mungundo luli wa Kutaha kwa Hae kwa bubeli, mi linaha kaufela ni mibuso ya njanja kwa mautu aluna, lika kaufela za lifasi za yunda, kono ka ku ziba kuli zazi leliñwi U ka taha mi uka luisa kwa Mubuso ko ku si ke kwaba mafelelezo, kamba, hauna ku nyanganyiswa. Mi ni ka ku nahana cwale kuli lu—lu sicaba sa Mubuso wani! O Mulimu, kenya mupato mwa lipilu zaluna ni lizebe kacenu, ka—ka Moya o Kenile, ka kutapiswa kwa mezi a Linzwi. Kakuli lu li kupa ka Libizo la Hae ni kwa kanya ya Hae. Amen.

<sup>3</sup> Ni bata ku atumela tuto kakusasana wo. Kakuli, Ne ni ka bulela fa taba yeshutana nyana kambe ne ku kaba sebelezo ya ku foliswa, kono ne lu zibisize kuli makadi a litapelo afiwe ka eiti, kuisa eiti seti kamba ka naene kiloko. Mi Ni tile. . . Billy natile kwa ndu mizuzu nyana yefelile mi ali ne ku sina mutu ni alimumu kwanu, kacwalo a sikafa makadi a litapelo. Kacwalo lu ka. . . Ni hupuzi kunga tuto ye, kwa sikululo ya keleke. Mi Ni bata ku bulela fa tuto yeli: *Keleke Ye Pumilwe, Ka Lifasi*. Ni bata kubala amañwi cwale azwa mwa Buka ya Baatuli, kauhanyo yabu 16, ku kalela fa timana yabu 10.

*Mi Delila ali ku Samisoni, Bona, u ni sehile, mane uni bulelezi buhata: cwale ni bulele, Na ku lapela, se si ka ku tama.*

*Mi ali ku yena, Ha uka ni tama ka mihala ye minca yesika beleka fateñi, fohe Ni ka fokola, ni kuba sina batu babañwi.*

*Delila kacwalo anga mihala ye minca ni ku mutama ka yona, ni ku mu bulelela kuli, Kiba Mafilisita ba kutezi, Samisoni. Mi ne ku nani ba ba mukundamezi kwa musiyu. Kono apuma mihala kuzwa mwa mazoho a hae inge bwanda.*

*Cwale Delila ali ku Samisoni, Kufitela cwale usa ni sehile, mi uni bulelezi buhata: uni zibise se si ka ku tama. Mi ki ha li ku yena, Haisi ha uka ota. . . manyeze a milili yaka a supile, ka bwanda bwa fa fulemu.*

*Mi kiha tiisa milili ya hae ka kwa mapo, mi ali ku yena, Kiba Mafilisita ba kutezi, Samisoni. Ki ha zuha fa buloko, kiha zwa mi acomola mapo mwa kota, hamoho ni lisila.*

*Mi ki hali ku yena, Uka bulela cwani kuli, Na ku lata, kanti pilu ya hao ikwa hule nina? bona seli la bulalu unzo ni seha fela, mi ha. . . usika ni bulelela mata a hao amatuna fazwa; mi hausika ni bulelela mata a hao amatuna fazwa.*

*Cwale ha nza mu kataza, ka lipuzo ka mazazi kaufela inza mutoliya, ni ku mu susueza, kuli moya wa hae wa koliwa mane ku shukelwa kushwa;*

*Mi amu bulelela sesi mwa pilu ya hae kaufela, ali ku yena, Mbeli ha i sika ni beula kwa toho; kakuli Ni bile Munazareni wa Mulimu nisali mwa mba ya boma: ha Ni ka beulwa kwa toho, mata aka a kazwa ku na, mi Ni ka fokola, mi ni ka swana sina batu kaufela.*

*Mi cwale Delila habona kuli u mu bulelezi sesili mwa pilu ya hae kaufela, alumela ku biza. . . malena ba Mafilisita, ali, A mu tahe cwale, kakuli u ni bulelezi sesi mwa pilu ya hae kaufela. Mi malena ba Mafilisita ki ha bataha ku yena, nze ba lwezi masheleñi, kamba ku tambeka masheleñi mwa lizoho la hae.*

*Cwale amu lobaza fa mañwele ahae; kiha biza muuna, kuli abeule manyeze a supile a milili ya toho ya hae; mi. . . akala ku mu fokolisa, mi mata ahae azwa ku yena.*

*Ali ku yena, Kiba Mafilisita ba kutezi, Samisoni. Mi cwale azuha fa buloko, mi ali, Ni ka banduka ka ku itamulela sina sapili, ni itamulele. Kanti ha zibi kuli MULENA u mu tuhezi.*

4 Cwale Ni bata ku bala, ka tuto ya taba ye, ye fumaneha mwa Buka ya Sinulo, kauhanyo ya 2, ku kalela ka timana yabu 21 ni litimaza za bu 23.

*Mi Ni mufile sibaka kuli abake ka buhule bwa hae; kono asika baka.*

*Bona, Ni ka mukasheza fa bulobalo, mi ba ba fosize ni yena ni ka ba kenya mwa butata bo butuna, ha ba sa bakeli misebezi ya bona.*

*Mi Ni ka bulaya bana ba hae ka lifu; mi likeleke kaufela lika ziba kuli ki Na ya tatuba lipilu ni liteka: mi Ni ka fa mutu ni mutu wa mina kuya ka misebezi ya mina.*

Cwale Mulena aekeze limbuyoti za Hae kwa palo ya Linzwi la Hae.

5 Samisoni, mufuta omutuna sina keleke, na kalile fela hande. Na kalile fela mwa nzila yende. Na kalile, mi na bizizwe kuli ki sinata sa muuna wa ndume. Na kalisize, ku sebeleza Mulena, ka ku buluka Manzwi la Hae ni kueza Litaelo za Hae. Mi sani nesiswana sina keleke. Ne i kalile hande ni yona, sina mo lu kona ku bulelela, kakuba mubulelelo wa lifasi, ne i kalile ka muhato omunde. Ne i kalile ku mamela Litaelo za Mulena. Mi haibile fela Samisoni na latelela Mulena, Mulena na itusisa Samisoni.

6 Kakuli, Mulimu wa kona ku buluka mutu kaufela ni ku itusisa mutu kaufela yakona ku Mu latelela, kakuli ki musebezi wa Mulimu. Kono ha lu sikululela ku sili, kuzwa kwa lika za Mulimu, fohe kipeto Mulimu ha sa itusisa luna ni hanyinyani. Ha lu ka zamaya ka tundamo mwa Litaelo za Mulimu, ha lu ka ina mwa makepe a Bible ni ku lapela ka Linzwi leli ñozwi, ku Mu lapela mwa Moya ni mwa Niti ya Linzwi, fohe kipeto Mulimu wakona ku itusisa mutu ufi kaufela. Kono ha ka ikungela bucaziba bwa ku sikuluhela kusili ku sesiñwi, fohe kipeto Mulimu ha sa itusisa mutu yo ni hanyinyani.

7 Kacwalo, Samisoni ubupa mufuta—mufuta luli wo ipitezi wa ponahazo ya keleke ya kacenu. Keleke ha ne ikalile, Mulimu na kona ku itusisa keleke, kakuli keleke neizamaya hande ka tokomelo ya Litaelo za Mulena, ne ibulukile likatulo za Hae kaufela ni milao ya Hae, ni kupeta Litaelo za Hae kaufela. Mi Mulimu nali ni keleke. Kono ku bonahala kuli ku na ni sibaka sesi fokola mwahala keleke.

8 Muhupule, ha luyo fa papali, kono lu mwa mafulo a ndwa. Batu babañata ba hupula kuli haba ba Bakreste kuli kona ze ba lukela kueza fela, kuli sani sika feza lika kaufela kamita, habali Bakreste mi lika kaufela likaba bunolo. Musike mwa ba ni zecwalo mwa litoho zamina. Kakuli, Ni bile Mukreste kuli nilwane, kulwana ndwa yende ya tumelo. Ni ba Mukreste, kuli ni kene mwa mafulo a ndwa. Luna lu masole ba Sikreste, mi lu

lukela ku lutiwa ni ku hulisiwa, ni kuziba makilikicani kaufela a sila, kuziba mwa ku i sileleleza, kuziba mwa ku—ku lwanela ndwa. Mi lukona fela kueza cwalo Moya o Kenile ha unzo lu patululela. Ha lukoni kunga seo linaha zeñwi lilu bulelela ha lu ya kwa ndwa, zeñwi za mihupulo ya bona. Kono lu na ni kuikungela mihupulo ya luna bañi, ka nzila yeo Moya o Kenile uka lu etelela, ni mihupulo ye A ka lufa, kakuli ki Yena Muzamaisi Yomutuna wa mpi ya Bakreste.

<sup>9</sup> Samisoni naezize hande, nali muuna yomutuna kufitela ha kala ku, akala ku ba ni mufuta wo (luka ubiza kuli) ku itamaela mutakafulele, kufitela ha kala kuzwa mwa nzila ya hae. Mi ni keleke ne i zamaile hande, mi neili fela hande kufitela ha ba zwa mwa nzila yabona. Samisoni akala kuba mwa mielembo. Mi nasabi mwa mielembo ni basizana ba ma Isilaele, na kalile kuba mwa mielembo ni basizana ba Mafilisita.

<sup>10</sup> Mi seo siswana sina keleke mone i ezelize. Nei sika eza lilato ni batu ba yona, ne i zwezi ku baba sika lumela ni kukala ku bapala ni baba sika lumela. Fani kona fone lupangezi mafosisa, amatuna mi mafosisa amatuna luli, ki fani keleke hane kalile kueza lika ze sika luka. Ne i kalile ku buluka, sina Samisoni, siango sesi maswe.

<sup>11</sup> Samisoni, haibile fela na inzi mwa siango sa batu ba Mulena, na ezize ze lukile. Kono ha na kalile ku fumaneha ni liango ze maswe, kona fana kenezi mwa butata.

<sup>12</sup> Mi cwalo kona moku inezi ni keleke. Fani keleke hane ilatelezi ka likute kwa tamaiso ya Moya o Kenile, Mulimu na ba fuyozi, mi limakazo ni liponiso ni ze komosa ne li latelezi keleke. Kono hane i kalile kuba mwa siango sesi maswe, ni lifasi! Iliñwi ya lika ze maswe zene i ezize, ni lika za pili ze ne i ezize, nei kalile ku ongaonga, ku ikaba fahali mwahala balumeli babañwi, kakuli ne ba fumani kuli linaha neli sweli kuikonga kongga. Kono Evangeli tuna ye hai sika fiwa kwa naha iliñwi kamba kwa batu. I filwe ku “ya lata kaufela, a tahe,” linaha kaufela, lipuo, mishobo, ni batu. Mulimu na salati kuli lu ikabele miseto ka milulwani.

<sup>13</sup> Kono batu ne ba bata kuba cwalo, ne ba swanisisa, kamba ku likanyisa babañwi, ku zamaya sina—sina lifasi mo li ezeza, ku bulela lika ze ba bulela, kuba ni kupunyuha sina mo ne ba ezeza za kupunyuha. Ha lukoni kuba mwa punyuhu ka kueza lika zeo lifasi lieza. Lukona ku punyuha feela halunze lu latelela likatulo za Mulimu ni nzila ya Hae mwa ku ezeza lika. Ha lukoni ni hanyinyani, ka ku latelela mukwa wa lifasi. Haiba kampani ya kwai i pangile zeñata ka televishini, mi haiba nyangela ya macwala ni zekola ibile ni punyuhu yetuna ka kubeya zeñwi fa televishini, fo ha ki sisupo sakuli keleke ika itibahaza ka kuya fa televishini. Ku punyuha kwa keleke kuyemi mwa ku kutaza Evangeli, ya Mata a Mulimu, ni ponahazo ya Moya. Ha lukoni ku

bulela kuli kakuli televishini ieza sa *kuli-ni-kuli* kwa kampani ya kwai ni ba—ni li kampani zeñwi! Haluna ni haiba Liñolo lelikana la kuli lulike kuba sina batu bani. Mi haibile fela lueza cwalo, lwa kona ku biza batu ba bañata, kono sani haki sona sa na lu tomezi Mulimu kuli lu eze. Lu hupula kuli luba mibala kaufela, lufufa ka kulenda, likopano zetuna, kueza lika ze tuna ze tabisa ze taha, kuli yani ki punyuhu. Lu sweli ku shwa zazi ni zazi ka mautu aluna, kubulela ka moya! Kambe ne luka yema baba tiile babaeza lule halishumi baba tiile kakusasana wo, ni Moya o Kenile usike waba ni luna, ne kuba ba hande kuli lu yeme ba lishumi ba batile ni Moya o Kenile ku luna. Halukoni ku ibapisa kwa lifasi.

<sup>14</sup> Mi iliñwi ya lika za pili, neli, keleke nei kalile kuikokonga ili yona. Kopano yapili neli keleke ya Katolika, mi kiha kutaha keleke ya Lutheran. Ha ne bato ikongakonga mwa keleke ya Katolika kuipanga kuba kopano, zazi leliñwi sekuba muhuwo, “Kiba Mafilisita ba ku tahezi, Samisoni,” mi Samisoni ki ha pumaka mihala ya keleke ya Katolika, mi Martin Luther azwa mwateñi ni kopano.

<sup>15</sup> Mi ki ha batama keleke ka muhala omuñwi, sina Delila mwana ezelize. Mi ba kala. . .mwa sibaka sa kuba ni mutu ya bizizwe ki Mulimu, mutu yana bizizwe ka Moya o Kenile; mwendi ki ya na sa zibi ni ABC ya hae, kono kiya na ziba Kreste. Mi keleke ki ha ikena mwa mikwa, ni kuba mwa mufuta wa babuleli ba litaba za naha. Mi kiha ba fa bakutazi ba bona “mapampili abuituti,” mutu ni mutu nana ni kuba Muituti waza Bumulimu. Wani neli muhala omuñwi wa kutama keleke. Batu ba zwa mi bayo balisisa, sibaka sa lituto kaufela silika ku tahisa baituti ba bande ili kuli keleke yabona iikuhumuse, “Mulisana wa luna ki Muituti waza Bumulimu.” Mi neba ezize sikamañi? Yomuñwi ulika kuba ni zibo kufita yomuñwi. Kulukile, seo ha si talusi sika kaufela fapila pata ya Mulimu.

<sup>16</sup> Mi hakuna tuso yakuli mutu kaufela aikungele butali bwa hae bwa lifasi ni ku lumba Mulimu ka bona. Ki bunyefuli fa pila Mulimu! Kimo mu ka shwela ku tabisa Mulimu ka tato ya lifasi ni zibo, kakuli “ki bulwanisi ku Mulimu,” kona sa bulela Mañolo. Ha koni kueza cwalo.

<sup>17</sup> Mi mutu kaufela ulika kuba ni butali. Ba ziba sa ku eza ni manzwi a kubulela, mi iba fela makande a naha mwa sibaka sakuli ba bonise ka mata, Liñusa la Moya o Kenile leli kenanga mwa pilu ya mutu ni ku fumana libi za hae. Ba lutilwe mwa kubela ni mubulelelo waza naha, mi ha lutokwi zeo. Paulusi naize, “Linzwi neli tile ku luna, isiñi fela. . .kamba, yona Evangeli, ka Linzwi fela, kono ni ka Mata ni ponahazo ya Moya o Kenile.” Sani si tisize Evangeli, ku bonahalisa mata a Moya o Kenile! Kono baana ba kaufela ba yanga kwa mikopano ya bu kutazi mi bayo ituta lituto ze tuna, mwa kuyemela kwa pata a sicaba, moba lukela ku bulelela, moba

lukela kutinela ni mo ba lukela ku ezeza, ha ba lukeli kuitusisa sikuwa sa ku lobaka. Cwale, zani ki zende kwa ngambolo ya za naha, kono luna ha lubati manzwi a kalembeshwa ka mutu. Paulusi naize, “Evangeli ye Ni kutaza neisika taha ka mukwa ocwalo, kono I tahile ka ku shemunwa kwa—kwa Moya o Kenile ni Mata a ponahazo.” Ha itahi ka mubulelelo wo lukisizwe hande, seo butali bwa mina bu kona kuba sona, kusicwalo sepo ya mina ikaba mwa butali bwa mutu. Kono i tahile ka ponahazo ya Mata a Kreste ya zuhile. Yani kona Evangeli, “Ku Mu ziba mwa Mata a zuho ya Hae.”

<sup>18</sup> Mutu ni mutu ulika ku nahana kuli una ni butali nyana kufita yomuñwi, kopano ifi ni ifi. Ba Methodist ba kali, “Lu na ni muuna ya butali kufitisisa.” Ba Baptist ba kali, ni ba church of Christ, ni babañwi cwalo, kaufela bona, “Luna, ki luna baba butali kufitisisa. Luna, batu ba—ba luna, ha lu lumelezi mutu mutu fela kuyo kutaza Evangeli.” Kono ba baketaka ka kusupiwa. (O Mulimu, ulushwele makeke!) Ku ba supa; haiba ba nani mapampili a lituto zeñwi, fohe kipeto baba beya mwa keleke. Mulimu hakoni ku mu swala ni hanyinyani. Ni bata mutu yaka ni kutaza abe ya supilwe ki Moya o Kenile, Mulimu u nanuzi, isiñi kusupiwa ki mutu kamba ka likopano.

<sup>19</sup> Zibo kaufela! Ba li, “Oh, lwa ziba kaufela zona za Teni,” mi babañwi ba ku bona ha ba zibi taku yapili ya Moya o Kenile. Ba I latula.

<sup>20</sup> Si ni hupulisa kabuka kaka nyinyani kone Ni balile zazi leliñwi mwa California, se kufitile myaha ye lishumi. Ne ni ka ngile mwa sibulukelo sa libuka za kale. Ni li bezi yana ka ñozi. Ki kabuka kaka likana ma cent a lishumi, kono ne ka na ni lika zende ni ha ne ka bonahala ku sehisa ni ku talifisa. Kono, Ne ni fumani sesiñwi mwani sene si utwahalile kuba sina Mulimu, ku na. Mi leliñwi la makande ne likala cwana. Kakusasana omuñwi mwa sikalamunanga sa likuhu, ne ku na ni kakombwe ka kañwi kaka nyinyani kene ka hupula kuli ne kana ni ngana kaufela yene lukela ku zibahala. Kiha ka fufela fa sipokisi ni ku njoma njoma fa sipokisi ka mulomo wa kona, hane kamba ha ketalizoho, ku kutisa toho ya kona kwa mulaho ni ku tungula ka mukwa omusika utwa mukombwe ku tungula cwalo. Mi ni zeñwi, kiha liiseza kwateni muhupulo, mi se kali, “Likezeli ni mizwale ya sikalamunanga sa likuhu se, Ni tabela ku ambola ku mina kaufela kakusasana wo fa litaba nyana za tuto ye lu sa zo panga.” Kali, “Ni fumani zibo yeñata mwa ku balisisa kwa ka,” kanze ka hohela magilasi akona fa halimu a mulomo wakona. Mi se kali, “Ni fumani kuli luna likuhu lwa kona ku ba hande ka zibo yeñata. Kabakaleo, Na kona ku mi bulelela kuli ko, haiba lukona ku kata ni ku yepa mukokolombwa kamba musima, lu ka fumana vitamini ye ka lutusa ku tungulanga hande, mafufa amande. Mi, oh, Na kona ku mi bulelela mo lukona kuikeza bunde ili luna ka linzila ze shutana.”

21 Mi tu nasikuku totu nyinyani ni mishukwe ya tona ye fubelu, se tu seha fela ni kubulela kuli, “Kana ha ki yomunde?” Mi luli se tu ka lakaza. “Oh, yena ki mukombwe ya butali!” Si ni hupulisa bakutazi babañwi ba kwanu ba lituto ba. “Muuna ya butali cwalo! Ha ku na tuso ya kuli luipeye mwahala likuhu zeñwi, kaufela luna lu lukela ku zamaelela ni yena.”

22 Kulukile, ka kuhu kateni kasika feza kale ku bulela makande akona, ne kuna ni kakuhu ka kañwi kene ka sina mafufa amande, ka taha ka mata kuzwa mwa patelo ya likuhu, mi kali, “Bashimani, fa muzuzu fela! Ni zwa kwa kuteleza fela makande cwanoñu fa silimba. Likuhu kale liekezeha ka teko ye likana lipaundi zene za ma cent, kaufela luna luka yo bulaiwa kamuso! Bunde bwa zibo ya mina bu ka eza sikamañi?”

23 Muzwale, zibo kaufela ye lukona ku ikungela, ki bunde bufi bo ilueza? Lu masila alikana liñokolwa ze silezi! Kaufela luna lwa shwa ka bu nyinyani ni ka mizuzu. Zibo ya luna haina se i talusa. Lu bata ku Mu ziba. Kono bona ba eza cwalo.

24 Sina ha Ne ni bulela nako yeñwi yefitile ka za nyunywani ya kuuta, mi nei hupula kuli ina ni zibo kaufela yene—yene lukela ku zibiwa, mi nei ziba kuli yakona ku bulelela zeñwi za linyunywani kuama batu. Kacwalo ya fufela fa sikalamunanga sa kona ni kukala ku ambola ka batu, mone ka ziba kaufela za bona. Mi, hañihañi fela, muituti yazwa kwa Purdue ataha ni kukala ku bulela manzwi amañwi amatuna ku yena, mi mucaha wateni ato kobakoba meto ni ku sikulula toho ya hae ni. . . Cwale, nana ni meto, na kona kubona muituti. Na nani lizebe, na kona ku muutwa. Kono, ka niti, na sa zibi sana ambola fa teni. Kiñi? Una ni ngana ya bu nyunywani. Ki ngana fela ya bu nyunywani. Ki zona fela za nani. Yena haana ngana ya butu, kacwalo hakoni ku nahana sina batu.

25 Mi ni haiba mutu hakoni ku nahana sina Mulimu! Mina mu batu, mi zibo kaufela ya lifasi haki sesiñwi kwanda kuba ngana ya bu nyunywani. Kaufela se mu eza, mu ka ikolofaza fela ka yona. Mu lukela kuba ni maikuto a Kreste.

26 Libaka leo batu bayelanga ku yo i kenya mwa likopano, mi ba beya litaba za kuitumelisa mazoho mwa sibaka sa kupepwa sinca, ba lika ku fitelela kupepwa sinca. Ha ba lati kupepwa sinca. Mi ba—ba ziba kuli lwa li luta ka Bibebe, kacwalo ba bata ku yolisa lika zeñwi ku yona. Mi batu ba Pentekota seli baba maswe, ka kulika ku yolisa lika zeñwi! Ba libata kuba mwa sitopa. Lilukela kuba ze pahami luli, “Lu ka swalana mwa mazoho ni kuikopanya mwa keleke, ni ku fafalezwa kamba ku kolobezwa,” kamba sika sesiñwi. Ba saba ku pepwa sinca. Na fokuñwi ni lumela kuli ba Branham Tabernacle ba saba ni bona!

27 Cwale, kaufela luna lwa ziba kuli kupepwa, Ha nina taba kamba ki kwañi, kamba kai, ki kokucwani, ki busafa. Haiba mbututu upepelwa fa manyalala, fa mubu otiile,

kamba mwa sibaka sesi kabisizwe hande sa sipatela, ki busafa, nihakuba cwalo. Kupepwa kwa namani, kupepwa kwa sika kaufela, ki busafa.

<sup>28</sup> Mi kupepwa sinca ha ki sika si sili kwanda busafa! Kono batu ka bungulunde luli, “Luna lukaya ko ba swalana mwa mazoho. Lukaya ko ba sa kubamangi ni ku lila, ni ku nata fa katala ni ku lila.” Mu bata kuba fela ba butu! Se lu tokwa ki kupepwa, ku shwa, sani kona sesi tisa Bupilo!

<sup>29</sup> Peu, likwili la kale, peu ya likwili, hamu unga likwili lani ni ku libeya mwa mubu. Kufitela ha mu kaba ni makwili amanca, likwili la kale lani lilukela ku bola. Mbonyi ha ikoni ku tahisa bupilo bo bunca konji haise ibolile.

<sup>30</sup> Mi muuna kamba musali hakoni ku ba ni kupepwa sinca konji maikuto abutu bwa hae abole, ashwe, ku shwela kwa katala, ni kuhuwa, kuli bakene mwa busafa, kufita fa nako ya ku zusa bungulunde kaufela mwa mulala, mi muka pepwa sinca ka Moya wa Mulimu. Ha ni na taba kamba wa kalumuka, ku bulela ka malimi, ku-tulaka-tulaka, ku kibakiba inge kuhu ye pumilwe toho, utisa Bupilo bo bunca! Kono lu yolisize sika sesiñwi, lu bata nzila ye pahami, luli.

<sup>31</sup> Ka zazi leliñwi, Labufaifi, ba kuluna ni Na neluya kwa sintolo. Ha ni talusi ku ikuhumusa ka se. Kono hane luya mwa mukwakwa cwalo, Ne ni sweli fela ku sikululela toho yaka kwa neku lisili, basali ba mapunu. Ne ni sepisize Mulimu ha Ne nili sibofu, ha Na ka folisa meto aka Ne ni ka talima fa lika zende. Mi Ni beile ka fapahano kaka nyinyani mwa mota yaka. Ha Ni bona lika ze cwalo, Ni talima fa sifapahano ni kubulela kuli, “O Mulimu, Ani kona Masabelo aka,” hane Ni sweli kutalima fa sifapahano.

<sup>32</sup> Ni boni basali bani. Meda sali, “Ha lusika bona musali niyomukana kacenu ya tinile sikoci.” Mi kiha sali, “Bill, talima musali yani ni tuhala totunyinyani twani fa halimu a siapalo sa hae,” mi ali, “uni bulelela kuli musali yani ha zibi kuli zani li fosahalile?” Ali, “Haiba ha zibi kuli ku fosahalile, kona kuli u lyangani mwa minahano.”

<sup>33</sup> Se nili, “Fa muzuzu fela, mulatiwa. Yena ki mu American, u eza sina ba Muzuzu mo ba ezeza.” Se nili, “Ne nili mwa Finland ha ki kale hahulu, lizwabande.”

<sup>34</sup> Mi se Ni buza muuna yana ni inisize fafasi, Caziba Manninen. Mi neluya kwa—kwa kuyo tapa, koku bizwa sauna, mi ba miisa mwahali ni kuyo misela mezi a cisa, kamba mezi fa macwe a cisa, mi kipeto za mi fufuleliswa. Mi ba mi kupa kuli mutulele mwa mezi a bata, mi ni kukuta. Mi ba miisa mwa sibaka sa ndu, mi kuna ni ma nasi mwateñi, basali baba tobanga baana (mi nibona baba mapunu), baba kenya hape mwa kasa. Na hani koni kukena. Mi se Nili, “Caziba Manninen, ao ki mafosisa.”



35 Ki hali, “Ku lukile kanti, Muluti Branham, ao ki mafosisa. Fohe ku cwañi cwale kwa baalafi ba mwa America baba tubulanga musali ni ku mu lobaza fa tafule, ku tatuba sibyana kaufela sa—sa sibupeho sa nani? Kana kucwañi he kwa ma nasi ba mina mwa lipatela?”

36 Se nili, “Ni swalele, Muzwale Manninen, Manninen, ubulela niti.”

37 Ki sikamañi seo? Ki lizo. Ha ne Ni li kwa Paris Ne nisa koni ku lumela zani, kuli mayaukelo a baana ni basali neli alimuñwi. Ne ni sa utwisisi zani, kuli mandu a ku pumulela na yahilwe kwa bukaufi ni mikwakwa ya baana ni basali hamoho. Ne nisa lumeli kuli fani basali ha bayanga kwa linuka ku yo tapa, mushimani ni lizwabande la hae, ha bana sibaka kwa ku tinela, neba tubuzi liapalo zabona kaufela kuisa kwa sibyana sa mafelelezo, ni ku sikuluha ku yotina tuhala ni kuyo tapa, kono ku cwalo. Ha baisezi ngana kwa teni. Ki sizo sa France.

38 Mwa Africa, basali ni baana, banana ni babahulu, haba na litino ni hanyinyani, banze ba zamaya mwahala mabala. Ba sa zibi seo mandu aku pumulela ali sona, kamba lika, kamba ha ba sika bona kale lika ze cwalo. Kono ha ba zibi shutano. Ha ba zibi shutano. Kono ki lizo za linaha.

39 Kono se Nili, “Mulatiwa, luba ba shutana, lu zwa kwa Naha isili. Lu bazamai mi lu baenyi fa, sani kona sesi eza lika ze ku bonahala ku fosahala hahulu. Kakuli Bibebe iize, ‘Bao baba ipulela cwalo, kuipapata, ba bonisa kuli ki bazamai mi ki baenyi, ba bata munzi osa taha.’”

40 Muuna kamba musali mwa Italy, mwa France, mwa Africa, mwa naha ifi kaufela, ya kile aba ya pepilwe sinca ka Moya o Kenile, ha ezanga lika zani. Hana kutina litino zani. Ha ana kuezwa cwalo, kakuli ki wa Naha isili ye Mubusi wa Yona ni Mubupi ki Mulimu. Luna lu zwa kwa Lihalimu. Mioya yeli ku mina, kona ye nyakalalisa bupilo bwa mina. Haiba mu ba America, mu ka eza moba ezeza ba America. Haiba mu ma French, mu ka eza mo ba ezeza ma French, ni ku hanyeza ba bañwi. Kono haiba mu ba Mulimu, mu ka eza mo ba ezeza mwa Lihalimu, kakuli Moya wa mina uzwa kwa Halimu mi Wa mi busa.

41 Taba nyana yemu lukela kutalima fateñi. Mwa Mañolo, bani baba batile Munzi o munca wo, neba pilile ka kushutana. Ne ba ipulela kuli ki bazamai mi ki baenyi. Kono kwa siemba sa Kaine, ne ba bile bayambaeli ni ba bakwenuheli. Kono Bakreste nebali bazamai ni baenyi. Muyambaeli hana lapa, mukwenuheli ki mutu ya sabisa. Kono buzamai ki nto yeñwi ya niti, mi ki yazwa kwasibaka sa niti mwa Naha yeñwi, ya lika ku fumana nzila ya kuya kwa Hae, uipaka ka kupila kwa hae kuli una ni sesiñwi sa Naha isili. Lani kona libaka.

<sup>42</sup> Kono ibo batu baba ezanga cwalo, batu bani baba tinanga lika zani, ni mi bulele. Mwa South Africa, hane Ni boni bahedeni ba baeza likiti ze mashumi amalalu, mapunu, baba ikapesa likubo. Ba lilimo ze lishumi ka liketalizoho kazesilezi-, lishumi kaliketalizoho kazene-, basizana ba lilimo ze mashumi amabeli za kupepwa, bashimani basina ni haiba kaapalo kalikañwi, bali kuyema fani ni sileze kwa lipata za bona, bali ku ipenta, masapo mwa lingo za bona, ni likota ze lepelela kwa lizebe za bona, ni masapo a batu kamba masapo a mañwi mwa milili ya bona, meno a lifolofolo inza lepelela fa halimu abona, mapunu ona mone batezi mwa lifasi, mi ha ba zibi. Kono ha ne ba amuhezi Kreste, ni kuwa ka lipata zabona ku amuhela Moya o Kenile, ne ba yemi ni ku puta mazoho abona ku swala maswabi fa lifuba za bona, ha ne banze ba zwa kuyo bata litino za kutina. Kiñi? Ne ba tiloba bazamai ni baenyi kwa lifasi le. Haleluya! Ne bali kwa hule ni Yena. Eeni, sha.

<sup>43</sup> Oh, eeni, batu ba baipiza kuli ki Bakreste. Ki ba siemba sa likeleke. Ba ya kwande mi bali, “Luna luba Methodist. Luna luba Baptist. Luna luba Pentekota. Luna luba Lizazi-labu Seveni. Luna luba *se, sani*, ni *sesiñwi*.” Sani hasina ni sesikana sa kueza ni sona. Moya wa mina, bupilo bo buli ku mina, bubulela ni kupaka seo muli sona. Jesu naize, “Ka miselo ya bona mu ka ba ziba.”

<sup>44</sup> Keleke seibile sina Isilaele, pili. Ne ba talimile linaha zeñwi za bahedeni kaufela kuli lina ni malena. Mulimu neli yena Mulena bona. Mi ne ba boni linaha za bahedeni kuba ni mulena, kacwalo ne ba bata kupila sina linaha za bahedeni, mi ki ha baitiseza bona bañi mulena. Mi hane ba ezize cwalo, ba kena mwa butata. Ka bunyinyani se likala kukena mwateñi. Ka bunyinyani lifasi se likala ku ba kenela. Mafelelezo ba felela ku Akabe. Mulena alimuñwi yana li bukaufi ni zona, bukaufi nyana ni zona, mi mafelelezo ato hamula bupilo kuzwa mwateñi. Mi ki bani se baya. Mi cwale Mulena wa niti hana tile, ne ba sika Mu ziba.

<sup>45</sup> Yani kona taba yeswana yeo keleke i ezize. Ii añuzi. Ki fo cwale. Ii añuzi lipolitiki, lituto. Ii añuzi likopano, katengo, likeleke zetuna, bakutazi ba buikangabeki. Mi cwale Mulena wa niti ha ka taha, ha ba Mu zibi, mi basweli ku takisa ona Moya o Kenile woli Mulena bona. Ha ba Mu zibi, kono ba Mu seha ni ku Mu bona bukuba. Sina Majuda mo ne ba ezelize Mesia wabona, keleke iieza Mesia wa yona ka mukwa oswana. Ha ba zibi. Ha ba na pono ya moya, kakuli ki ba bali hahulu mwa lituto za bona ka meto abona mi ze ba bona, ki miyaho yemituna, kulika ku ibapanya ni lifasi. Ha lusika ba kale ba batuna—batuna kuli luibapanye ni lifasi. Lu pahamisizwe ili kuli lu ikokobeze.

<sup>46</sup> Mi, alimuñwi ki yomuñata, ku Mulimu. Mi kacenu mwa libaka za bu kutazi bwa babuleli, kuna ni balwanisi babañata, ba lwanisi. Alimuñwi uli, “Kulukile, ufuyole Mulimu, Ni na ni

likiti zeñata. Ni na ni mukopano o mutuna kufita o munani.” Ki shutano mañi ye si eza seo? Luna ni alimuñwi kamba ki lule, ki shutano mañi ye si eza? Kana lwa sepahala ku Mulimu? Kana lwa sepahala kwa Linzwi la Hae? Kana lwa yema mwatasa tatubo ya Moya o Kenile? Ki niti yeo nji? Yani kona taba yaluli.

<sup>47</sup> Kono luna lu keshebisa Bibebe. Buñata bwa batu ba luna ba Pentekota, ona fa Lituto zetuna za Bibebe ye, kukeshebisa. Kuna ni . . . Ha ni lati ku holofaza maikuto. Ni inzi mwa keleke yaka tota, mi Ni ikutwa kuli Ni—Ni kona fela kueza, mwa keleke yaka, kakuli Ni kutaza Evangeli. Kono kuna ni ma Pentekota ba baeza likiti ze lishumi za bakutazi ba baziba kuli hakuna sika sesi cwalo mwa Bibebe sina kolobezo ka libizo la “Ndate, Mwana, Moya o Kenile.” Ni swabisa ma bishopu ba batuna, kamba mutu kaufela, kuli ani bonise koo mutu kaufela akile akolobezwa ka libizo la “Ndate, Mwana, Moya o Kenile.” Kono ba keshebisa, kakuli ba likopano ba ezize cwalo. Hakuna ni haiba mutu alimuñwi mwa Testamente ye Nca, ni ka lilimo ze mianda ye milalu hasamulaho, ka litaba za kale, kono ki bene ba kolobelizwe fela ka Libizo la Jesu Kreste. Ki sikamañi seo? Kopano. Yani kona yeli ezize. Kukeshebisa!

<sup>48</sup> Mi kacenu bangile babeleki kaufela bafa mikwakwa. Bangile kambuli mwa keleke. Bangile kanya kaufela ku i zusa mwa keleke, ni kuikungela likutazo za buitungu, mifuta ya mukutalezo wa kakombwe kakanyinyani ka kale, kaufela ba wezi mwa buino bwa buipiteli, mi basali ba kubona batina tuputula ni lindelesi ze kakatezi fa mibili, ni baana ba zuba kwai, ni ku laula ni kubulela litaba za lisheha. Ki maswabisa fapila pata ya Mulimu! Na ziba seo si buhali, kono seli nako yakuli yomuñwi abulele sesiñwi. Kukeshebisa, ku ñala, kupila sina lifasi!

<sup>49</sup> Ha ni na taba kamba Ni ka yema ninosi, kusina mutu kono Mulimu fela anosi, Ni ka kutaza Niti ya Bibebe ya Mulimu ni ku I yemela. Haiba Ni shwa, Ni ka ba ni yemela Niti. Kaniti. Lu bata Niti. Na hanina ku likanya ka keleke, kono kuya ka Linzwi la Mulimu Ni bata ku likanya.

<sup>50</sup> Kono Delila, kana mulemuhile, na zibile kuli Samisoni nana ni mata. Mi na sa zibi kone kuna ni mata ani. Na sa zibi seo mata ani nali sona, kono neku nani mata amañwi ao Samisoni na nani, mi na bata ku abatisia. Mi, Delila, na sweli ku shemaeta Samisoni ka bunde bwa hae. Oh, na apezi ka mapunu fela. Mi a zamaya fa pila hae mi aimekisa sina babañwi ba banca ba kacenu, ni—ni zeñwi cwalo, ni kubata ku eza inge taba isili fela, muina mapunu, kulika ku shemaeta Samisoni ku yena.

<sup>51</sup> Yani kona taba yeswana yeo lifasi liezize kwa keleke. Cwale Mata amina amatuna ainzi kai?

<sup>52</sup> “Kulukile, ha luka ikopanya, zani lika lobaka Mata.” Ba keleke ya Katolika ba ezize cwalo.

53 “Kono Mafilisita kiba ba kutezi, Samisoni.” Mi Luther azwa mwateñi.

54 Mi ba to ikopanya hape. “Ha u ka ni tama ka muhala usili, uka ni swala.” Kacwalo ba eza.

55 “Mi Mafilisita kiba ba ku sweli, Samisoni.” Kiñi sene siezahalile? Wesley azwa mwateñi mi apuma mihala.

56 “Cwale u ni pumile nako ye kaufela. Kana ha u zibi kuli Na kulata, Samisoni? Ku lukile, aku ni bulelele niti yemwa pilu ya hao.”

“Ku lukile, a ku ni tame ka muhala omuñwi.”

57 “Ku lukile, cwale lu ka eza cwalo.” Ki sikamañi seo? Wani kona muhala wa likopano.

58 “Mu ni tuhele ni lukuluhe, kuli Ni sike naba ni kopano. Fohe, Na mi bulelela, mu ka ni kona.” Kacwalo kwa zwa ba Pentekota. Mata a hao akai?

“Mafilisita kiba baku sweli.” Mi a pumaka mihala hape.

59 Kono cwale kiñi zene ezahalile? Ne lingile ba Pentekota, Baituti ba batuna ba Bumulimu kuba balisana ba bona, baana babañwi baba tuna. Baba na ni lituto zetuna ni lizo sina ba Methodist ni ba Baptist, kamba kaufela baba siyezi ze ba nani. Ha mu ya mwa keleke ha mu na ku utwa nihaiba “amen,” kimo kubata sina sikoto sesi Kangezi sesi ketuhile kwa Neku la Mutulo. Kubatatile! Kufilikana! “Mi cwale Mafilisita kiba baku sweli, Samisoni.”

60 Mafilisita kiba ba ku sweli, America. Ikai swalisano yani ya moya? Bukai buñwi bwa Pentekota? Ba Assemblies of God, ni ba United, ni ba church of God, ni *se, sani, ni sesiñwi*, mutu ni mutu ni mulao wa hae, yo una ni *sani*, mi yo una ni *sani*. Luba ba fapani maswe kufitela hamu kona kuya mwa tolopo kuyoba ni ancafazo, haiba keleke yeñwi ika lifa mali, babañwi baba siyezi kaufela habana ku ba kwateni. Ba Swalisano kiba ba kusweli, America.

61 Mata aluna akai? Kanya ya luna ikai? Ki sikamañi sani? Kakuli luile ka butali bwa mutu isi ka Mata a Mulimu! Kiñi, ba na ni bakutazi li lika baba omelezi milala, kufitela ha ba lu kopanyize ni kuba ba tiile ni kuomelela milala, kufitela batu. . . Kana mu sa utwanga ku huwa mwa keleke ni hanyinyani? Ha mu sa utwa mutu ya lila. Sipula sa balili si beilwe mwa malibela. Ha ku sana kanya mwa keleke. Selu eza kaufela ki kuina kwa mulaho baba omelezi milala mo lukona kubela. Ha lu sika lukuluha. Lu tamilwe. Yena diabulosi, ka madimona a hae abenya, u tamile keleke ya Mulimu ya pila. Yani ki niti. A ku sana Mata mwa keleke. Aku sana tukuluho. Batu ki baba tiile hahulu mi ba omelezi milala! Kiñi, yena Mulimu wa kona kutaha mwahala sicaba sa ba Pentekota, ni ku bonisa Ki Mulimu, ni kubonisa lisupo za Hae za zuho ya Hae, seo mane ha

si ba nyanganyisi. Kanya! Kiñi, ki maswabisa! Ni zamaile mwa mafasi amañata, Mulimu inza beleka, ku eza lisupo, ni batu ba ina, mi, “Kulukile, Ni bona kuli zani li lukile. Oh, Na ziba za kona ku ezahala.” Ha li ba nyanganyisi! Kiñi? Bona ba tamilwe ki Delila, lona lifasi. Bainzi mwa mawenge.

<sup>62</sup> Cwale mane kale bafita mwa, ku tamiwa kwa katengo. “Mafilisita kiba ba kusweli, Samisoni.” Ki sikamañi se mu ka eza ka zona?

<sup>63</sup> “Oh, lu na ni likopano zetuna.” Luli. “Luna ni batu babañata kufita be lukile lwaba ni bona.” Kono Moya u kai? Ukai Moya o Kenile?

<sup>64</sup> Sani kona sa ezize diabulosi. Li hohezwi mwa keleke. Li bile li hoha keleke ka kushemaeta, “U tahe ku luna, Ni ka kufa tabernakele yetuna luli kwanu haiba u ka eza fela se. Ha u ka leleka mukutazi yani wa sikuba yemu nani, mi muikungele muuna, Caziba waza Bumulimu yana ni ngana, lu ka yaha muyaho o munde wa keleke yeipitezi mi lukaba sina babañwi ba kubona.” Maswabi ku wena! Kukaba hande ni be ni mutu yasa zibi masamba a ezizwe fa manawa, kono ki ya talizwe ka Moya o Kenile, yana sike a keshebisa, ka Mata a Mulimu.

<sup>65</sup> Kono li fitile, oh, ki zetata hahulu, kufitela mutoziwa yomuñwi ha kena mwa mukopano ni ku bulela ka malimi, kamba ku huwa nyana, kamba ku eza sesiñwi, mi babañwi kaufela ba ka mbomoka fela ni kutalima. “Sani neli sikamañi? Kulukile, nakomoka kuli kiñi? Bwani ikona kuba bupulumuki bobu wile kokuñwi.” Mwa ziba yeo ki niti! Batoziwa babañwi baba shebile ba kena, ba tabela hakalo ni ku yemisa mazoho, mi ba lile ni kulumba Mulena, yomuñwi ahuwe kuli “amen” kwa kutazo ya Evangeli, mi babañwi ba bona ba sikuluha ni kubona sana bulela. Bwani ki Bupentekota. Ki butata mañi? Mu i swanisisa kuba Methodist, ku ba Baptist; bona ba swanisisa kuba Katolika; ba Katolika ba swanisisa kwa lihele. Mi, kaufela zona, ki za lihele! Kulukile.

<sup>66</sup> Delila u mi shemaetezi mwa likeleke zetuna, ki hande, bakutazi ba baitutile, ba nga sitopa sesinde. “Kulukile, mwa ziba, *Mukete-ni-mukete* wa kwanu ki muluwi wa mamilioni, ha lu ka munga kuli atahe mwa puteho yaluna! Oh, mawi!” Ha iba ha sika pepwa sinca, fohe ha lukeli kuba kwani. Ha nina taba kamba una ni ma dollar aeza lule. Haiba u na ni ma Cadillac a mashumi amane, seo kaufela anani, una ni kupepwa sinca, atahe cwalo kwa kupepwa sinca mi a zuluswe ka Moya o Kenile, mi azwe kwani aepilwe sinca, inza tampakani (mu ni swalele), inza lila ni kuhuwa, mi inza zwelapili cwalo sina babañwi moba ezeza, ni kupila bupilo hasamulaho wa fo kuli u Si amuhezi. Amen. Sani kona se mu tokwa.

<sup>67</sup> “Samisoni, Mafilisita kiba ba kusweli.” Ba Swalisano kiba ba kusweli. Lifasi li ku sweli. Diabulosi u ku sweli.

68 Ba ya mi ba bona Moya wa Mulimu ha ueza limakazo ni kueza lika za zuho ya Hae, seo Jesu na sepisize, ba li, “Mwa ziba, Na sepa Muzwale Branham una ni hahulu ku nahaniseza kwa butu. Bo mulisana ka nebali ki za diabulosi.”

69 Wena mubotana, wa muipi, muhedeni ya pumilwe, kaufela baba itutile luli, mina litongwani mwa boya bwa lingu! Jesu naize, “Kambe mu Ni zibile, ne mu ka ziba lizazi la Ka.” Kono muna ni bo Saule ba bañata baba lika ku mi eza kuba sina babañwi ba lifasi.

70 Lu bata sikwata sa baana ba Mulimu ba basa keshebisi fa Linzwi, kono ba kutaze Niti ni ku yema fa kolobezo ya Moya o Kenile.

71 Kono lifasi li ezize sikamañi? Li kukuzi Mata amina kaufela. Ne mu pepilwe muli ma Nazareni, ba Pentekota, kono lifasi kaniti li kukuzi Mata amina. Cwale ki baba tiile fela sina babañwi kaufela.

72 Lu ka eza sikamañi? Ki sikamañi se sika ezahala? Ku na ni taba iliñwi ya kanya yeo Ni kona ku nahana kuli nifeze kutazo ye.

73 Kanako yeo Samisoni hana tamilwe! Ha lukoni kuba ni ancafazo. Muteeleze ku muzwale waluna ya ikokobelize, Billy Graham, “Ancafazo mwa lizazi laluna!” Muteeleze ku Oral Roberts ahuwa. “Ancafazo mwa lizazi laluna!” Muteeleze ku babañwi babona kaufela, “Ancafazo mwa lizazi laluna!” Lukona ku ba cwani ni ancafazo ha lu tamilwe? Lu tamile Moya o Kenile, ka tutengo twa luna ni lizo, mi ha lu sa kona kuba ni ancafazo ya Moya o Kenile. Amen. Na ziba seo sa cisa luli, ka mo ku inezi, kono ki Niti. Kana lukona cwani kuba ni ancafazo ya Moya o Kenile ha mu li baba tamilwe mi baba tiile! “Mufuta wa bumulimu,” Bibebe ibulezi kuli ba kaba cwalo. “Mufuta wa bumulimu, kono ba ka latula Mata ateni.” Mata a sikamañi? Mata a katengo? Mata a lifasi? Mata a keleke? Mata a Moya o Kenile! Sani kona sibaka sa mukunda mwa keleke. Mi cwale keleke ha iañula bakutazi baba itutile, ni miyaho ye mituna ni zende, mwa sibaka sa kuba ni Moya o Kenile mwa mufuta wa kale, ba lukela kuba mwa musebezi hape. Amen. Kiniti. Kana mu ka ba cwañi ni ancafazo ya Moya o Kenile, mbo batu basweli ku U hatikela ni ku U tama mi ba U saba? Fani kona fo kuna ni butata.

74 “Mafilisita kiba ba ku sweli.” Kono sepo iliñwi ye lunani, fani Samisoni ha na sali mwa tolongo. . .

75 Ki sikamañi sa pili sene ba ezize hane ba musweli? Ne ba mutamile, pili. Ne ba mu amuhile mata ahae, ne ba fumani kunutu ya hae. Ne ba fumani kunutu ya hao. Lifasi li fumani kunutu ya hao. Cwale mina basali kaufela baba ota milili yamina, i zamaya sina lifasi. Mina baana kaufela muya mupila sina lifasi. Kaufela li lukile, mubulela litaba za lishano ni ze sehisa za masila, mi muzwela fande ni kuyo zuba tukwai

nyana, ni kumata mata ni basali ba be mubapani ni bona, ni lika kaufela ze cwalo, tuno nyana totu swala musebezi wa mina. Ne ni ka lobala ka mba yaka ni kuca mañende a mukele ni kunwa mezi amwa mitai, ni kupila ya kenile ni ya petahalile fa pila Mulimu, kufita ku keshebisa ka mufuta wa musebezi kaufela. Yeo ki niti. Kiniti. Mupile ka niti ku Mulimu.

<sup>76</sup> “Samisoni, Mafilisita kiba ba kusweli.” Ba Branham Tabernacle, bu si lifasi bu kena ku mina. Ku cwani he ka zeo? Kana mu bonahalize kunutu yamina? Kana mu bonahalize kunutu yani yana mi file Mulimu hane mu sali mwa liluli lani myaha ye minyinyani ye fitile? Kana mu tuhelezi kuli lizwe ka butu, bwa mufuta wa milapelo? Ki sikamañi sesi ezahalile ku mina? Mulimu wa kona ku shetumuka ni kuto eza makazo ni kukena mwahala batu ku ba bulelela likunutu za lipilu za bona, ni lika kaufela, ni kufolisa bakuli ni baba nyandile, ni ueza liponiso ni ze komosa, ni ku kutaza Linzwi la Hae ka tata mo kukona kubela, ka Moya o Kenile; mi batu bali, “Kulukile, Na bona sani silukile. Lwa ikolanga ku si teleza nako hasamulaho wa nako, haiba ha lu sika katala.” Yani ki Branham Tabernacle. Mafilisita ki baba kusweli.

<sup>77</sup> Fani, neku banga kuli ku kutaza kwa Linzwi, mi batoziwa ba kale ni mioko mwa meto abona, ne ba yemanga ka matutu ni ku zamaya, kucipita, mane mwendi basa buleli ni haiba linzwi, banze ba zamaya fela, habeli kamba ha lalu, mi baina fafasi, batezi Moya o Kenile cwalo! Linzwi neli ba fepa! “Mutu ha na kupila buhobe fela, kono ka Linzwi kaufela lelizwa mwa mulomo wa Mulimu.” Mafilisita kiba ba kusweli, Branham Tabernacle.

Mafilisita kiba ba kusweli, Pentekota.

<sup>78</sup> Kakuli, Mafilisita ba sweli, ba mina kaufela, kale kale hane mu i kopanyize ka kutiya, hakuna sene sika taha mwateñi konji haiba ki waba Presbyterian, Baptist, Methodist, Katolika, kamba sesiñwi. Ne musina sa kueza ni babañwi baba siyezi babona.

<sup>79</sup> Kacwalo, ancafazo mwa lizazi laluna? Lukona cwani ku ba ni yona kanti mufi wa ancafazo u tamilwe ka lifasi? Mulimu ha koni ku taha mo ku na ni za lifasi, mwa kona fela ku itinga ku zona. Muikeza siango ni lifasi, fohe ki—ki zona fela. Ha mu lumeleza lifasi ku kena mwateñi, mu yo eza sina lifasi, fohe kipeto mu felile. Kono ha mu ka puma mihala kaufela kuzwa kwa lifasi, ni kutaha ku Mulimu, Mulimu uka itusisa mina kufitela muya kwa kulyangana hape.

<sup>80</sup> Kiye fa sepo inosi yeo Ni nani kakusasana wo, kuli ni feze Liñusa laka, ki ye, “Fani Samisoni hana sa tamilwe, sikusha sa milili yemiñwi sa mela.”

<sup>81</sup> Mulimu a lu lumele Keleke yeñwi lusika ba kale kwa mafelelezo a nako, kuli Mata a Moya o Kenile akone ku taha ku yona, ka ponahazo ya Moya, ni Mareka 16 ika latelela Keleke, Likezo 2:4, Likezo 2:38, kaufela yona ika latelelanga

hande hamoho mwa Keleke. Lisupo ni ze komosa lizamaye ni ba apositola. Liponiso zetuna za zuho ya Hae inze li zamaya ni bona. Hane lu sali mwa tolongo, kaniti Mulimu usweli ku melisa sicalano kokuñwi, kwa ku bulaya kwa mafelelezo kwa mutoba hañwi. Ha ibe wena, mulikanaka wa Mukreste mo kakusasana cwana, hakube kuli mata aha akale ku shoshela. Ni lapela kuli Liñusa le kakusasana wo, ni kwande kwa mafasi koo likaya, Ni sepa kuli Liñusa le likatusa ku tahisa ma vitameni kwa milao ya mina ye ka melisa Mata a moya ku kutela mwa bupilo bwa mina hape.

Halu inamiseni litoho za luna mi lu lapele.

<sup>82</sup> O Mulena Mulimu, Mubupi wa Mahalimu ni lifasi, Mutateki wa Bupilo Bobusafeli, ni Mufani wa mpo kaufela yende ya moya, akunge manzwi a kakusasana wo mi u a beye mwa lipilu, ni ku a selaela, Mulena. Cwale batu ha ba lapelele fa lika ze, kaku bona kuli lifasi li hohile keleke mi mafelelezo li fumani Mata ayona, li fumani sibaka sayona sa mukunda, li fumani fo ku yemi kunutu ya yona, mi lii kukuzi fateñi. Li ngile batu bene ba huwanga tulo sapili, sapili nebana ni tulo, mi liba kukuzi yona, kuli bano itulelanga kwa malapa la Bulalu busihu ni ku buha makande fa televishini. Li zusize nyakalalo mwa lipilu za bona, ni kubafa lilato lelituna la lifasi kufita le ba nani ku Mulimu. Li bafile lifasi ka buñata, za lifasi, takazo yetuna ya kunyakalala kwa lifasi kufita kutazo ya Evangeli. Haiba ha kuna lilata lelituna ni zeñata ze ezahala, ni za kuliza ni ku zwelapili, fohe kipeto ha balati Evangeli ya mufuta wa kale, ni hanyinyani, sani sitisa mioko ya tabo mwa moyo, sani sitisa foliso ya Bumulimu kuba kukuta, sani si kutisa limpo za ba apositola mwa keleke, sani sitisa Krete ya zuhile, Mesia wa lizazi le.

<sup>83</sup> Kono sina Isilaele hana tamilwe ka—ka malena ba hae, kuli ne basa lateleli Mulena bona wa luli; mi Mulena wa luli, ha Na tile, ne basika Mu ziba. Ki mo kuinezi kacenu. O Mulena, yena Mulena wa Kanya uiponahalize mwa mufuta wa Moya o Kenile, mi, Mulena, ha ba u zibi. Ha ba u lemuhi. Ki baba swalani hahulu kakutiya, kuli habakoni ku utwisisa, kakuli haliyo mwa kopano ya bona. Mulena, wo ki musebezi wa diabulosi wo ezize se kwa batu.

<sup>84</sup> Cwale bo Samisoni ba Mulimu, bao ba buniti mwa lipilu, bani baba nani kunyolelwa ni ku lila, ni ku kupa ni ku swalelela cwalo, ha ba pile ni zona, Mulena, kufitela licalano zenca ze ha lika mela, kufitela hape haku kataha nyakalalo mwa Sione, mi ku tahe sikwata sesika lemuha ni ku utwisisa, sesi ka bona Mesia ni Mata a patilwe a patezwi lifasi, ao ba sa koni ku utwisisa cwale. Alaba, Mulena, kuli ba bone se. Kakuli lwa li kupa ka Libizo la Jesu. Amen.



[Hakuna manzwi fa tepu—Mu.]

. . . Mata aona fa,

O Mulena, luma Mata ona fa

Mi u kolobeze boote.

Ne bali ndu ya fa limu,

Ne bali fela buñwi,

Moya o Kenile wa ta

O Mulena na sepisize.

O Mulena, luma Mata Ona fa,

O Mulena, luma Mata Ona fa;

O Mulena, aku lume Mata Ona fa

Mi u kolobeze boote.

<sup>85</sup> Kamo Ni Mu latela! Alume fela Mata a Hae! Ne bali mwa ndu ya fa halimu, kaufela bona mwa buñwi. Kaufela zeo lifasi neli anyize kubona. Ne ba sina ni sesikana, mi Moya o Kenile wata.

<sup>86</sup> Kacenu ba li, “Taha, uikopanye kwa keleke, aku beye libizo la hao mwa buka. Kamba kubama mi ubulele kuli, ‘Ni paka Kreste kuba Mwana Mulimu,’ na nuha.” Niyena diabulosi ueza ze swana. Kaniti. Diabulosi na kolobelizwe hane ku kolobezwa Judasi. Diabulosi nailo kutaza Evangeli fani Judasi ha na ilo kutaza Evangeli. Kono diabulosi na sikanga Moya o Kenile. Kona cwalo. Kwani kona koku nani Mata a patilwe, zuho yani, yani yaziba za niti, kusina muluti waku kakanya. Amen.

<sup>87</sup> Kiyu fa. Ona Moya o Kenile oswana wani, Omuñwi noli ku Mesia, usali fa Keleke ya Hae. Yena ha shimbulukangi. “Ni kaba ni mina kamita, mane ni kumina, kuisa mafelelezo a lifasi. Ni kaba teni. Misebezi ye Ni eza, ni mina muka ieza. Kufita niye mu ka i eza, kakuli Ni ya Ku Ndate.”

<sup>88</sup> Kono lifasi la keshebisa, “Oh, ao ki mazazi afelile!” Kizona fela diabulosi abata kuli mueze. Ba bata kuli mu eziwe ku ikutwa kulatiwa. Mulimu ubata kuli mukolobezwe. Mulimu u bata mina. . . Mu li, “Oh, ha Ni lumeli zani kaufela zaku zwelapili.” Muzwepili mupile, muzwelepili mupile mwa sibi sa mina, mupile mwa sibi sa mina. Kono kufitela ha muka bola, kufitela ha muka bola kwa minahano ya mina, kufitela ha muka bola kwa mitinelo ya mina, mi mube ya cincizwe ni kupepwa sinca, mi mane Bupilo bobunca bu kaba bo bu shutana kufita bwani bone buile fafasi.

<sup>89</sup> Lubeke lwa mbonyi haluya mwa mubu kilo lu ñandatalukeke, luyo mela kuba butala. Ikena mwa mubu ili ye tiile, iputezwe mwahali, imela inze ili bunolo mi izukuzwa ki moya. Oh, kanya! Haleluya! Fani moya ha ukala ku fuka, simela ha sikoni kueza sika kaufela kwanda ku nyanganya, kututa, kono ka mutai kakanyinyani—kakanyinyani ka nyanganya ni ku nyakalala, kahula hasamulaho, ka itiisa ili kona. Ha kakoni kuba lutaka konji haiba mbonyi i shwile ni ku bola. Isi fela kushwa; kono kubola. Ha ikoni ku kuta niha nyinyani, kono bupilo buzwile ku yona.

<sup>90</sup> Sina ha Ni ize nako nyana yefelile, kupepa ki taba ye sabisa, ye masila, bunoyi, masila a busafa, kona mwani kona moku iputezi bupilo. Ha muipona mina bañi kuba ba ba masila, kuipona bu Methodist, bu Baptist ni lituto za Pentekota kuba masila, ni kushwela fa aletare, fohe kipeto Bupilo bobunca bwa taha mwateñi. Moya o Kenile umi paheka fa halimu ase; mwa bona Mulimu.

<sup>91</sup> Luka Mu bona zazi leliñwi la kanya. Zazi leliñwi kwa buse bwa bupilo bwa butu, luka Mu bona. Mwa lumela seo? Zazi leliñwi kwa buse bwa bupilo bwa butu, kuna ni bu kamuso bobunde bobu ni libelezi.

<sup>92</sup> Ne ni yemi kwanu mwa lilulu busihu bwa maabani, ni kuhupula kuli Ni boni Rabbi Lawson yomunyinyani. Fani hana sa ina kwanu, ni kufita mwateñi ka mulamu wa hae wa kale ni kuni hola ka mulala wa hae, mwa mulala waka ka mulamu wa hae, kufita kwanu kwa katala, ni kuopela pina yani, “Kuna ni ze ni libelezi...” [Hakuna manzwi fa tepu—Mu.]...?...

<sup>93</sup> Sesiñwi sato ezahala! Ne si ngile lifasi. Na to kala ku bona lika ka kushutana. Ni bilaezwa hahulu ka mukwa obaeza batu ba America ba, kutundamena, mwaha ni mwaha, ku bona basali ni baana mo ba ishwaulela ni kukena mwa sibi, kufitela mane ha Ni bata ku pindumuka, habeli kamba hahalu, kaku bilaela kaza teni. Maabani, Ne niize ku Mulimu, “Ha ni sa bilaela ni hanyinyani. Linzwi la Hao liize kuka ba cwalo. Kono Ni ka yema yama pakani ku lwanisa, ka zeli kuna kaufela.”

<sup>94</sup> Ka zazi leliñwi, hane niyemi fa Sikayo sa Green, liñope laka, kwani kwa mulaho mwa lihalaupa, neni sweli ku lapela musihali kaufela. Mi mwendi ka sili kiloko, lizazi neli likela, mi Ne niyemi kwani ni talimile mwa buse, nato zwa mwa liñope, fa halimu a licwe lelituna. Mi Ne niyemi fani, ninze ni talimile kwa Upa, ni lumba Mulena. Mi Ne nikona ku bona lizazi ha li likela kwa mulaho wa likota fa halimu a lilundu, ha Ne ni talimile kwa buse bwa libala kokuñwi, ni macacani amañata kwateni, kwali kukuza kamo kukona kubela. Mi se Nili, “Mulena, zazi leliñwi U kile wapata Mushe mwa lihaha la licwe, mi Wa to mu fitelela, kakuli na katezi. Kono No fitelezi, na ize ‘ne ku bonahalile sina mukokoto wa mutu.” Se nili, “Uni pate mwa lihaha, Mulena.” Ka yona nako yani, kwa neku laka leliñwi, se kutaha Moya nyana ono fuka mwahala macacani. Ne uzamaya ona cwalo, kutaha hande kwa tuko ni na, Moya nyana unzo fuka, seuya mwahala mushitu. Na yema fani.

Zazi leliñwi, Mulimu waziba kuli kikai mi ki  
lili,  
Lipangaliko za batu lika yema likuzize  
kaufela,  
Mi kiha Ni kayo ina fa lilundu la Sione.

Zazi leliñwi kwa buse bwa bupilo bwa batu,  
 Zazi leliñwi, Mulimu waziba kuli kikai mi ki  
 lili,  
 (Kisikamañi sesika ezahala? U ka kwala,  
 lika ze nyinyani ze kaufela ze ezahala.)  
 Likezahalo za bupilo bwa batu kaufela lika  
 yema likuzize,  
 Mi lu kayo ina fa lilundu la Sione.

Kutaha fafasi, mwa koloi,  
 Ku to ningela kwa Hae;  
 Kutaha fafasi, mwa koloi,  
 Ku to ningela kwa Hae.  
 Ha u fita teni Na ni lisiyo,  
 Ku to ningela kwa Hae;  
 Zibisa Muzwale Bosworth, ni balikani, cwalo,  
 Ku to ningela kwa Hae.

Cwale kutaha fafasi. . . (Uka shetumuka zazi  
 leliñwi ku to ninga.) . . . kolo- . . .  
 (Kota kaufela ika tuka; Mangeloi a Mulimu,  
 koloi ye sabisa) . . . ku to ningela kwa Hae;  
 Kutaha fafasi, mwa koloi,  
 Ku to ningela kwa Hae.

<sup>95</sup> Leliñwi la mazazi a, leliñwi la mazazi a mwahala sibaka sa kwatasa liholo za lifu laka, Ni libelezi kuli A tahe. Yeo ki niti.

Ni talima Jordani Ni bona ñi  
 Ku to ningela kwa Hae; (sina Elia wa kale  
 yana talimile kwa buse bwa Jordani)  
 Sikwata sa Mangeloi a ni tahela,  
 Ku to ningela kwa Hae.

Kutaha fafasi, ku tuluka fafasi, mwa koloi,  
 Ku to ningela kwa Hae;  
 Kutaha fafasi, mwa koloi,  
 Ku to ningela kwa Hae.

<sup>96</sup> Yena Mulena Jesu, Mukoboci ya fuyozwi wa koloi ye, Muzamaisi wa sisepe sa kale sa Sione, ona mukolo wa Bupilo, ya sweli ku zamaya mwahala muyaho, yabulela, Pata ya Hae iteni mo. Ona Moya o Kenile ono Mu zusize mwa libita uteni mo.

<sup>97</sup> Kakuba kuli haba si kafa makadi a litapelo, kana kuna ni yomuñwi mo yazwa mwa tolopo ya kwande, yo Ni sa zibi, yatile kuli ato lapelelwa? Mu nanule mazoho amina, bao Ni sa zibi. Munanule mazoho amina, Ha ni zibi. Wena, wena fo. Na sepa mucaha yomunyinyani fani ni mulelu kwa mulaho koo, kuna ni ya nana nanuzi lizoho la hae kwa mulaho kafo. Ee, wena, kana nonanuzi lizoho la hao? Ku lukile. Kwa mulaho kafo, mina, muñaka. Ku lukile. Mina kaufela mu baeñi ku na? Kuli Mulena Jesu, yena Mulisana yaswana wa mutapi kwanu, kana mwa lumela lisepiso za Hae kuli kiza niti? Utozanga

keleke ya Hae, mi “Misebezi ye Ni eza, muka ieza, ni mina. Mane ye mituna nikufita mu ka ieza, kakuli Ni ya Ku Ndate. Yemituna ku fita ye!” Mwa lumela cwalo?

<sup>98</sup> Kana no nanuzi lizoho la hao kuli ha uni zibi? Kana wa lumela Mulimu wakona kuni bulelela sesi mwa pilu ya hao, wakona kubulela kuna sina Mwa kile a ezeza ku musali yana sweli mungundo wa Hae? Kana wa lumela ki Yena Muprisita Yomituna yakona ku swaliwa ki maikuto a matuku aluna? Haiba Mulimu uka patulula kuna buino bwa hao, kikuli u ka ni lumela kuba mupolofita wa Hae, ku lumela kuli Pata ya Hae iteni mo mi kona libaka Ha li lumeleza? U lapelela musala hao. U lobehile noka, noka ya hae iweyukile. Yeo ki niti. Haiba ki niti, aku nanuhe. Ku lukile, zamaya umu fumane, uiketile. Amen.

<sup>99</sup> Kucwañi ku wena kafo kwa mulaho, mutangana yomunyinyani yana nanuhile yani, yana nani mulelu? Kana wa lumela ka pilu ya hao kaufela? Kana wa lumela Mulimu wakona kuni bulelela matata bwa hao? Kana wa lumela mwana hao wa mushimani ukaba hande? Wa lumela? Una ni mushimani, una ni butuku bwa kulyangana. Yeo ki niti. Wena ha u. . . Ki kwa Kentucky. Haiba yeo ki niti, nanula lizoho la hao. Na hani ku zibi, Nji cwani? Haiba Na kuziba. . . Nanula mazoho ahao sina *cwana*, mane ha luzibani. Yeo ki niti. Kusepa ku Mulimu. Kana wa lumela? Ha nzo lumela, uka yo fumana mushimani wa hao ka mo lumelela. Fela ubeye seo mwa pilu ya hao.

<sup>100</sup> Ki mañi fa yana nanuzi lizoho la hae, yo Ni sika—sika. . . Kana neli wena? Ku lukile, muñaka, kikuli wa ni lumela kuli ni mupolofita wa Mulimu? [Muuna uli, “Amen.”—Mu.] Wa lumela, ka pilu ya hao kaufela? Ha u lukeli ku yema, aku nanuhe fela onafu. Ku lukile, muñaka, butata bwa hao ki bufi, una ni butuku bwa shuka mwa mubili. [“Yeo ki niti.”] Mi ya kataza liutu la hao. [“Eeni.”] Uzwa kwa Ohio. [“Eeni.”] Libizo ki mina Bo. Miller. [“Yeo ki niti.”] Kuta kwa ndu mi ube hande. Ku lukile, u lumele ka pilu ya hao kaufela. Ku lukile.

Kana walumela ka. . . Ulumele cwalo. Haiba wakona ku lumela!

<sup>101</sup> Kalibe yainzi fa, kana no nanuzi lizoho la hao? Kalibe ya hulile, yaapezi magilasi, wa lumela ka pilu ya hao kaufela? Wa lumela ka. . . Kana wa ni lumela kuli ni mutanga Mulimu? Wa lumela? Ku lukile, haiba Mulimu wa kona kuni bulelela butata bwa hao, kikuli uka lumela? Butata bwa pilu. Ku lukile, nanula lizoho la hao haiba yeo ki niti. Ku lukile.

<sup>102</sup> Kalibe yo fakaufi ni wena, na yemi. Pilu; kono luli ki meto a hao. Na mu ziba. Ku lukile, haiba wa kona ku lumela!

<sup>103</sup> Kwa mulaho kafo, muuna ya tatama una ni butata bwa pilu, niyena, ni butuku bwa litalo. Kana wa lumela kuli Mulimu uka kueza hande? Wa lumela, muñaka?

104 Kuna ni muuna kwani kwa mulaho kokuñwi, na nanuzi mazoho ahae yana sika . . . Bo. Schubert. Ku lukile, muñaka. Ku lukile, kana wa lumela? Ki meto ahao, hape, nji cwani? U lapelela bo maho baba inzi kwani, ni bona. Haiba yeo ki niti, nanula lizoho la hao. Lu baëni. Kana ki niti yeo? Nyanganyisa lizoho la hao, mu nyanganyise mazoho amina ku mañi ni mañi. Ku lukile, ku hande. Haiba wakona ku lumela, wa kona ku amuhela!

105 Jesu Krete ya zuhile uteni mwa muyaho. Yena ki Yaswana. Si eza sikamañi ku mina? Kana mu tuhelezi lifasi kuanya mata kuzwa ku mina? Kanya! Ni bata kupepwa ko kunca! Ni bata Bupilo bobunca! Hanina taba bupahamo bo Si ka fita kubona, haiba Ni lukela kuba mupikuluhi ya kenile, sika kaufela. Hanina taba bupahamo bo Si ka fita kubona, Ni bata Moya o Kenile wa luli sina oli kuna cwale. Ni bata ku U buluka! Ni itakaleza kuba ni Ona kufita lika kaufela za lifasi. Amen! Kana mwa lumela? Kana mwa lumela Uteni mo?

106 Mu beye mazoho amina ku yomuñwi ni yomuñwi, he. Mu ni bulelele taba iliñwi fela Ya kona kueza. Hakuna. Mube ni tumelo cwale. Mulumele kuli kufelile.

107 Mulena Mulimu, Mubupi wa Mahalimu ni lifasi, Mutateki wa Bupilo Bobusafeli, ni Mufani wa limpo zende kaufela, Moya wa Hao uteni mo usweli kutoza, Mulena, ku bonahala inge muyaho wa buyela, ku zukuzeha kwa mulaho ni kwa pata. Kiñi kanti batu haba sa utwisisi, Mulena? Kana bana—kana bana ni silikani hahulu ni lifasi, mi base babata ni kuenya ni kutatela, kufitela mane habasa Ku ziba ni hanyinyani? Mulena Mulimu, cwale Mata a anate mutu ni mutu, mi mutu kaufela ya kula afoliswe, mueza libi kaufela apiliswe, mi Mulimu aikungele kanya. Ka Jesu Krete, yena Mwana Mulimu, Na kupa. Amen.

108 Kana mwa lumela seo? Munanule mazoho amina. Kana mwa amuhela foliso yamina? Mulimu ami fuyole. Cwale muye mi mufumane fela ona cwalo momu lumelela, ku kaba ona cwalo. Ni bona lipono ze tahela babañwi. Yeo ki niti. Ni nani kukuta kwanu busihu bwa kacenu.

109 Haiba hamu lumeli cwale, ha muna ku lumela ni kamuta. Yeo ki niti. Jesu nakile aeza cwalo nako yeñwi, mi sebali, “Wena u. . . Lwa ziba fo Mesia ha ka taha, Uka lu bulelela se.” Musali ali, “Na ziba Mesia uka eza cwalo. Kono ki Wena mañi?”

Yena ali, “Ki na Yena.”


110 Musali ki ha matela mwa munzi mi ali, “Mutahe, mutobona Muuna Ya zibile seo Ne nili sona nize Ni ezize. Kana yo ha ki yena Mesia?”

111 Yena ali, “Lika ze lika ezahala hape mwa mazazi a mafelelezo. Keleke ika kutazanga Niti, Ika yema fa Linzwi. Ika ezanga Litaelo kaufela za Mulimu. Ha ina kuikenya mwa siango ni lifasi. Mi ni mwani Ni ka zamaya ni kueza lika ze swana.”

<sup>112</sup> Kono Yena ali, “Ba kaba baituti, baba cuulukile, baba lata minyaka kufita Mulimu, babasa buluki buitamo, baba tameleza litaba, bakaba ni mufuta wa bumulimu,” ba bulapeli hahulu, bakaya kwa likeleke. “Bakaba ni mufuta wa bumulimu, kono baka latula Mata ateni. Kuba ba cwalo mutokolomohe!”

<sup>113</sup> Mina batu, kaufela fone muinzi mwa keleke, kuli U bizize ona fa, pono izwile ku na. Haiba—haiba yani neli niti, sene Ni bulezi, mi na nisa zibi zeo ka mina, mu nanule mazoho amina, yo kaufela nali yena. Mwahala keleke kaufela, mutu—mutu kaufela. Ku lukile. Mwabona? Hani ba zibi, ha nisika babona kale; kono Moya o Kenile uteni mo mi Wa baziba. Kana mwa bona kuli haki na?

<sup>114</sup> Muteezele! Haiba Uka ni paka ka seo, Uka ni sepa ka Niti ya Linzwi, kakuli Niti ikona kutaha fela ka Linzwi. “Mubake, mutu ni mutu, mi mukolobezwe ka Libizo la Jesu Krete, ka swalelo ya libi, mi muka amuhela mpo ya Moya o Kenile, kakuli sepiso iezelizwe mina ni bana ba mina, bao babali kwahule, mane ni babañata be Mulena Mulimu wa luna akabiza.” Mwa lumela cwalo? Kuna ni kuba ni sebelezo ya kolobezo hasamulaho nyana fa.

<sup>115</sup> Halu inamiseni litoho za luna. Ni ka kupa bo mulisana kuli ba lapele habanze baitukiseza kolobezo. Na sepa kuna ni sebelezo ya kolobezo ye taha. Ku lukile. 

*Keleke Ni Miielo Ya Yona*  
(*The Church And Its Condition*)  
Muyana 5, 1956, Lasunda Kakusasana

*Munyako O Kumbani*  
(*Strait Is The Gate*)  
Liatamanyi 1, 1959, Lasunda Kakusasana

*Keleke Ye Pumilwe, Ka Lifasi*  
(*A Deceived Church, By The World*)  
Mbuwana 28, 1959, Lasunda Kakusasana

Mañusa a ka Muzwale William Marrion Branham, na kotalizwe mwa Sikuwa ili fa Branham Tabernacle mwa Jeffersonville, Indiana, U.S.A., mi azusizwe fa tepu ya magesi ya kungela manzwi mi apulintilwe mwa Sikuwa. Toloko ye yamwa Silozi nei pulintilwe niku hasanyiwa kiba Voice Of God Recordings.

LOZI

©2015 VGR, ALL RIGHTS RESERVED

VOICE OF GOD RECORDINGS  
P.O. BOX 950, JEFFERSONVILLE, INDIANA 47131 U.S.A.  
[www.branham.org](http://www.branham.org)

## Zibiso ya bahatisi

Litukelo kaufela li bulukilwe. Buka ye yakona kupulintwa fa pulinta ya mwa ndu kuli iitususwe ki mutu kamba kuli ifiwe ku yomnwi, mahala feela, kakuba siitusiso sa ku hasanya Evangeli ya Jesu Krete. Buka ye hailekisiwi, kuatiswa mwa buñata, ku nepelwa fa moya wa webusaiti, ku bulukwa mwa mukwa wo bunolo, ku tolokwa mwa mishobo isili, kamba ku itusiswa kwa kukupa mashelēni ku sina tumelelano niba Voice Of God Recordings®.

Ka litaba zeñata kamba ka libuka zeñwi ze liteni, shangwe muñolele kwa:

VOICE OF GOD RECORDINGS  
P.O. Box 950, JEFFERSONVILLE, INDIANA 47131 U.S.A.  
[www.branham.org](http://www.branham.org)